



Sarajevo, 22.03.2021. godine

MEDIJIMA

SAOPĆENJE ZA MEDIJE

Održan peti sastanak Pododbora za inovacije, informacijsko društvo i socijalnu politiku

Peti sastanak Pododbora za inovacije, informacijsko društvo i socijalnu politiku između EU i BiH održan je danas putem video-konferencije.

Sastankom je u ime BiH kopredsjedavao pomoćnik ministrice u Ministarstvu civilnih poslova Adnan Husić, a u ime Evropske komisije Alberto Cammarata iz Opće uprave za politiku proširenja i pregovore o pristupanju.

Predstavnici EU i BiH su, između ostalog, razmijenili informacije o provedbi Sporazuma o stabilizaciji i pridruživanju i preporuka Evropske komisije u oblastima obrazovanja i obuke, informacijskog društva i medija, istraživanja i inovacija, te zapošljavanja i socijalne politike.

Komisija je pohvalila učestvovanje BiH u programu Horizont 2020, programu EU namijenjenom istraživanju i inovacijama, a u kojem je do sada povučeno više od 8,5 miliona eura. Isto tako, Komisija je pozvala vlasti u BiH da se izradi i usvoji strategija pametne specijalizacije.

Prioritet i dalje ostaje poboljšanje koordinacije među institucijama u sektoru obrazovanja. Komisija je naglasila da institucije u BiH trebaju osigurati funkcionalan sistem (re)akreditacije visokoškolskih ustanova i studijskih programa u cijeloj zemlji. Također, vlasti u BiH su pozvane da osiguraju uslove za učestvovanje BiH u međunarodnim testiranjima PISA i PIRLS.

BiH je pozvana da usvoji zakon o elektronskoj identifikaciji i uslugama povjerenja za elektronske transakcije usklađen s *acquis*-em, te zakon o elektronskim komunikacijama i elektronskim medijima. Istaknuta je važnost izrade i usvajanja strategije za *cyber* sigurnost i strategije za pristup širokopojasnoj mreži.

U oblasti zapošljavanja i socijalne politike prioritet i dalje ostaje izrada i usvajanje cjelodržavne strategije zapošljavanja.

Direkcija za evropske integracije